

Misr Ke Firaun Ko Paigam

Taurat : Hijrat 3:1-22

Musā^(a.s) apne sasur, janaab Ruel, kī bheḍoñ kī dekhbhaal karte the. Ek dīn wo bheḍoñ ko jaṅgal me le kar gae aur ek pahaad par pahuñche jiskā naam Seenā' thā.⁽¹⁾ Us pahaad par Allaah taa'alā kā ek farishtā, jagamagaatī huī āg kī tarah naazil huā. Musā^(a.s) ne jhaadī me āg ko dekhā lekin wo jal naheen rahī thī.⁽²⁾ Musā^(a.s) ne sochā, “Main wahaan jā kar dekhtā huñ ki wo jhaadī jal kyuñ naheen rahī hai?”⁽³⁾

Jab Allaah taa'alā ne Musā^(a.s) ko jhaadī kī taraf jaate hue dekhā to Musā^(a.s) ko pukaarā, “Musā! Musā!” Aur unhone jawaab diyā, “Jī main haazir huñ.”⁽⁴⁾ Tab Allaah taa'alā ne kahā, “Paas mat āo aur apnī chappaleñ utaaro, kyuñki jis jagah tum khaḍe ho wo ek paak jagah hai.”⁽⁵⁾ Tab Allaah taa'alā ne kahā, “Main tumhaarā rab huñ jiskī ibaadat tumhaare buzurgoñ ne bhī karī hai, Ibraaheem se le kar Ishaaq aur Yaaqub ne bhī. Musā^(a.s) ne apnā muñh dhak liyā kyuñki unko ḍar thā ki kaheen unkī nazar Allaah taa'alā par nā paḍ jaae.”⁽⁶⁾ Tab Allaah taa'alā ne kahā, “Maine apne logoñ kī takleef dekhī hai jo Misr me haiñ. Maine unheñ cheekhṭe aur chillaate sunā hai. Sach me main unkī takleefoñ ko jaantā huñ.”⁽⁷⁾ aur main unheñ Misriyoñ se nijaat dilaaungā. Main unko aise mulk me le kar jaaungā jo bahut baḍā hai aur jiskī zameen bahut behatreen hai aur us zameen par jahaan dudh aur shahad kī bharmaar hai. Us zameen par ki jis jagah aur bhī dusre kḥaandaan ke log rahte haiñ, jo Kannaanī, Hittī, Amurī, Pharijzī, Hiwwī, aur Yaabusī log haiñ.”⁽⁸⁾ Maine Yaaqub ke kḥaandaan waaloñ kī fariyaad sunī aur main dekh rahā huñ ki Misrī log un par kitnā zulm kar rahe haiñ.”⁽⁹⁾ Isle main tumheñ Firaun ke paas bhej rahā huñ taaki, tum mere logoñ ko Misr se baahar nikaal laao.”⁽¹⁰⁾

Musā^(a.s) ne Allaah taa'alā se kahā, “Main kaun huñ jo Firaun ke paas jaaun aur Ibraanī logoñ ko Misr se baahar nikaaluñ?”⁽¹¹⁾ Allaah taa'alā ne jawaab diyā, “Beshak main tumhaare saath rahuñgā, jab tum un sabko Misr se baahar nikaal laao to tum sab isī pahaad par merī ibaadat karnā. Ye is baat kī nishaanī hogī ki maine kḥud tumheñ bhejā hai.”⁽¹²⁾ Musā^(a.s) ne Allaah taa'alā se kahā, “Jab main Ibraaniyoñ se kahuñgā ki tumhaare baap-daadā ke rab ne mujhe bhejā hai jiskī wo ibaadat karte the, to wo agar mujh se puchenge ki uskā naam kyā hai to main kyā kahuñgā?”⁽¹³⁾ Allaah taa'alā ne Musā^(a.s) se kahā, “Main ek hī huñ 'Jo huñ' aur tum Ibraaniyoñ se yahī kahnā ki usī ek ne mujhe bhejā hai.”⁽¹⁴⁾ Allaah taa'alā ne Musā^(a.s) se kahā, “Tum Ibraaniyoñ se ye kahnā, 'Allaah taa'alā, jiskī ibaadat tumhaare purkhe karte the, jiskī ibaadat Ibraaheem, Ishaaq, aur Yaaqub bhī karte the, usī ne mujhe bhejā hai. Yahī uskā naam hai aur āne waalī nasleñ bhī use isī naam se hī pukaarengī.”⁽¹⁵⁾

“Jao aur Ibraanī rahanumaon ko jamā kar ke kaho, 'Allaah rabbul azeem ne, jiskī ibaadat tumhaare purkhe karte the, jiskī ibaadat Ibraaheem, Ishaaq, aur Yaaqub bhī karte the, us ne mujhse baat karī hai aur kahā, 'Main tum logoñ kī dekhbhaal kartā huñ aur main jaantā huñ ki tum logoñ ke saath Misr me kyā ho rahā hai.”⁽¹⁶⁾ Main tum logoñ ko is museebat se baahar nikaaluñgā aur us jagah le kar jaaungā jahaan Kannaanī, Hittī, Amurī, Pharijzī, Hiwwī, aur Yaabusī log rahte haiñ. Us zameen par shahad aur dudh kī kamī naheen hai.”⁽¹⁷⁾

“Musā, main tumse kahtā huñ ki Ibraanī rahanumā tumhaarī baat suneṅge, tab tum un logoñ ke saath Firaun ke paas jaanā aur kahnā, 'Allaah taa'alā jiskī ibaadat Ibraanī karte haiñ usne hamse baat karī hai, isle āpse guzaarish hai ki āp hameñ jaṅgal me teen dīn kā safar karne kī ijaazat deñ taaki ham uskī ibaadat karen aur qurbaanī pesh karen.”⁽¹⁸⁾ Main jaantā huñ ki Misr kā baadshaah tumko jaane naheen degā jab tak usko ek baḍī taaqat ke zariye se majbur nā kiyā jaae.”⁽¹⁹⁾ To main Misr ke kḥilaaf taaqat dikhaauñgā aur unke beech me hairaan kar dene waale karishme karuñgā aur uske baad Firaun tumko jaane degā.”⁽²⁰⁾ Main tumhaare logoñ par itnā karam karuñgā ki Misrī log tumhaare logoñ par karam karenge aur tum me se koī bhī kḥaalī haath naheen āegā.”⁽²¹⁾ Har Ibraanī aurat apne paḍosī ghar kī aurat se sone aur chaandī kī cheezen aur kapḍe legī aur wo tum apne betoñ aur betiyon ko de denā. Is tarah tum log Misriyoñ kī daulat ko bhī apne saath le āoge.”⁽²²⁾